



DEO OPTIMO MAX. UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUODLIBETARIIS DISPUTATIONIBUS
manè discutienda in Scholis Medicorum, die Jovis decimâ-tertiâ
mensis Decembris, Anno Domini M. DCC. LIII.

M. JOANNE-BAPTISTA BASSEVILLE,
Doctore Medico, Præside.

An Chorea S. Viti Evacuantiâ, Narcoticis & Cardiacis interpolata?
I.



IX foetus in utero, velut in tumultu clausus, aut carcere coer-
citus, per integrum graviditatis tempus, innumeris propemo-
dum abortûs necisque indefinenter expositus periculis; om-
nes quas prægnans & ipse patitur ægritudines. In ipsomet
ortu, de vitâ, necdum vivens, cum morte certat ac pericli-
tatur; insalutarâ sæpè luce de tumultu in tumultum transit.
Si fausto partu, tot, tantis, tamque variis superstes discriminibus, ingredi-
tar vitam; subitâ insolitâque aeris pressione percussus, in ipsomet respira-
tionis momento, vix vivens, plurimo cum planctu de vitâ queritur amarè;

A

multisque vagitibus; miserias & ærumnas prælagire videtur ac deplorare. Apertis nondum ocellis, quam non videt lucem, refugere eum dices ac detestari. A primis ortus diebus usque ad pubertatem, infantia & pueritia lustris in luctu, variisque lactationis, torminum, dentitionis, lumbricorum & convulsionum ægreditudinibus atque laboribus, in doloris veluti seminario exactis; majoribus, quæ progrediente ætate excipiuntur, reservantur malis, eò gravioribus, quò mentis tunc compos factus, dolorem mortemque magis discernit ac reformidat. Quæcumque intrà vel extrà sunt, elementa videlicet & alimenta, necnon medicamenta, ad vitæ tutelam, morborumvè medelam necessaria, hunc cruciant, torquent, & etiam ei dum juvant, nocent. Mens ipsa, nobilioraque vitæ organa, morborum necisque causæ sæpè fiunt ac primordia. Non enim viscera tantum præcipuaque corporis organa, sed & omnes & singulæ partes, ne cuticulâ quidem, unguibus, tenuissimis fibrillis, ipsismet pilis porisvè exceptis, singulares propriosque habent morbos, aliosque aliis molestiores. Sui sunt insulares exercitii varietate diversi specialesque morbi. Nec parti uni unus, sed multiplex morbus. Plusquam septuaginta patitur oculus. (a) Sexcentorum morborum & ærumnarum, innumerarumque calamitatum causa uterus. Sunt & præterea vernaes, æstivi, autumnales, hyemales morbi, antiqui, novi, acuti, chronici, annui; innati alii, alii hæreditarii, benigni, maligni, contagiosi, pestilenciales, lethales; sunt & endemii, epidemici, sporadici, stationarii, insoliti, regulares alii, alii irregulares & anomali, intercurrentes, & per certas annorum periodos recurrentes, ab aliis & à semetipsis quotannis dispares. Tot, tantorum, tamque diversorum morborum generationes & metastases, successionesvè quis enarrare vel dinumerare posset? Quid plura? à capite ad calcem, necnon ab ortu ad occasum, totus, & omnis homo morbus. Novos præterea una quæque ætas, ulterioribus sæculis ignotos, & inauditos procreat morbos, quasi omnes quotquot sunt, fueruntvè ab origine mundi, complicati morbi, humani generis destructioni non sufficerent. Sic se habet morbus ille quem *Chorea S. Viti* nomine appellarunt, cujus licet, præscis temporibus, innotuerit nomen; nemo antè *Sydenham*, adæquatam huiusce affectûs tradidit historiam. Hunc perfectè delineavit (b) *Sydenham*, his verbis: „Pueritia convulsionis” est species, quæ pueros puellavè à decimo ætatis anno, ad pubertatem usque invadit, primò se prodit claudicatione quâdam, vel potiùs instabilitate alterutrinus cruris, quod æger post se trahit fatuorum more; postea in manu ejusdem lateris cernitur, quam hoc morbo affectus vel pectori, vel alii alicui parti applicitam, nullo pacto potest continere in eodem situ vel horæ momento, sed in alium situm, aliumque locum convolutione quâdam distorquebitur, quidquid æger contrà nitatur. Si vas aliquid quod potu repletum in manus porrigatur, antequàm illud ad os possit adducere, mille gesticulationes, circulatorum more exhibebit; cum enim poculum rectâ lineâ ori admovere nequeat, deducit à spasmo manum, huc illuc aliquandiù versat, donec tandem fortè fortunâ illud labris propiùs apponens, liquorem derepentè in os injicit, atque avidè haurit, tanquàm misellus id tantum ageret, ut deditâ operâ spectantibus risum moveret. „Spasmodici hujus affectûs descriptionem, à *Sydenhamo* mutuatam, ut accuratissimam eò lubentiùs admittimus, quòd medendi sussulta sit methodo, adeò verâ & certâ, ut omnem adimpleat curationis paginam.

(a) Democritus, epist. ad Hipp. de natu. hum.

(b) Schedu' monit. de novæ febr. ingr. p. 360. & process. integr. de morb. omnia curand. de chor. s. Viti pag. 506.

HOMINIS vita in motu. Si regularis & ordinatus, ritè functiones edit, & benè se habet: irregularis autem si fuerit, vel inordinatus, miserè vivit; motu cessante perit homo. Motus alius involuntarius, voluntarius alius; à diversâ partium structurâ, absque vel pro voluntatis arbitrio sese moventium; pendet illorum discrimen. Licet cerebrum verè sit motus omnis fons primus & origo, duos tamen principes partium motores, cerebrum nempe & cor agnoscimus cum *Biglivio*. (a) Immediatum & adæquatum motus organum fibra. Tota illius vis seu potentia movens, in peculiari fibrillarum seu villorum eam constituentium artificio posita est; undè motus omnis à fibrarum elaterio pendet, cum assiduo fluidorum influxu & resistentiâ; id est ab æquilibrio solidorum & fluidorum. Duplicis autem generis fibra; membranea una seu nervea; muscularis alia seu carnea; quæ origine, structurâ & usu differunt. Hæc, innumeris propemodum fibrillis seu fibrillarum stratis, quasi in fasciculos contractis, sibi mutuo & parallelo ordine unitis, & ab aliis parallelis transversim intersectis, contexta, abit in musculos, qui voluntarii & regularis motus sunt instrumenta. Illa ex infinitis pariter, sed irregulari & inæquali ordine est constata fibrillis, quæ medullæ & membranarum cerebri expansiones sunt & propagines, quæ cum nervis & per nervos, in universum corpus disseminatæ, omnibus & singulis partibus diversimodè distribuuntur, suntque involuntarii motus organum. Voluntatis aut naturæ legibus inversus, alio quovis modo turbatus depravatuse motus omnis, sub convulsionis nomine venit. Universalis alia, alia particularis; in oculis, labiis, linguâ, manu aliisque membris hæc; in febrium rigore, tremore, epilepsiâ observatur illa. In omnes & singulas corporis partes suam conjunctim, aut seorsim tyrannidem exercet convulsio. Pars nulla quæ spasmis affligendò non tentetur & distorqueatur. Omnes & singulas spasmodicarum affectionum species, hîc recensere, nostri non est instituti. Specialiter agemus tantum de eâ, quæ *Chorea* nomine insignitur. Morbus an symptoma sit hic affectus in scholis ambigitur, & inter Authores valdè & acriter controvertitur. Litem dirimentes, convulsionem modò habemus pro morbo, modò pro symptomate. Convulsionem distinguimus, in primariam seu essentialem & idiopathicam, aut in secundariam vel accidentalem & symptomaticam. Quæ per se & nullo præcedente morbo aggreditur, ut Epilepsia, morbus est primarius & essentialis: quæ verò alicui morbo aut vulneri supervenit convulsio, accidentalis est & symptomatica. *Choream* autem inter convulsiones annumerandam esse constat ex *Sydenhami* verbis, solâque symptomatum huic morbo essentialium inspectione, quibus à quolibet alio morbo convulsivo facillimè distinguitur. Idiopathicam quoquè convulsionem referre *Choream* cuique patebit attendenti, hanc, nullo prægresso acuto vel chronico morbo, pueros, quod rariùs, puellasque sæpissimè à decimo ætatis anno ad pubertatem usquè invadere. Hinc remedia quæ sanandis convulsionibus in genere conveniunt, huic morbo debellando, cæteris palmam facillè præripiunt.

(a) Cap. de
orig. motus
solidor.

I I I.

PRIAMARIAM hujus affectûs causam & originem scire si cupias, varios Artis Magistros consule. Suprà laudatus *Sydenham* qui, ut solet, *Cho-*
A ij

res symptomata delineavit adeò accuratè, ut ex solâ ægri inspectione morbus apprimè dignoscatur, de causis quidem, nihil, aut parùm reliquit, his verbis; (a) » cum affectus iste ab humore aliquo in nervos irruente, quorum » irritatione, istius modi motus præternaturalis pendere mihi videretur, » &c. « *Sennertus* (b) in delirantium classem reponit, rarum sed admirandum affectum, quem, à perpetuo & insano saltandi desiderio, sancti, cuius intercessione juvantur ægri, nomine, *Chorem* vel *saltum S. Viti* appellat. Simulatum à quibusdam, alias à *κακὸς αἰσιν* proficisci credit, quamvis & possibile sit hunc à naturali causâ provenire. Hunc quoquè morbum ad *ἐκθυσιασμόν* (c) veterum referendum esse censet. Aliquid quandoquè divini suspicatur, verùm sæpissimè à causis naturalibus, & humore maligno provenit: qui verò hoc morbo laborant, dies noctesque saltant. Narra-
rat *Felix Platerus*, (d) se *Basilea* vidisse scēminam cui *Magistratus*, viros aliquot robustos constituerant, qui, alternatim, uno sessio, altero succedente, cum eâ dies noctesque, per totum ferè mensem continuò tripudiant: etsi soleæ pedum attritæ essent, & licet aliquandò, ut cibum caperet, & somno correpta, sedere cogeretur, tamen gestu motuque nihilominus corpus veluti saltans agitabat. *Mathiolus* (e), inter *Choræa* affectos, & à Tarentulâ demorsos aliquam instituit similitudinem; *Chorem* tamen à naturali causâ ortum habere posse scribit, sub hâc verborum serie. » Cum » satis constet, quàm diversa symptomata, diversa deliria, variasque ima- » ginationes, inducat atra bilis, pro diversâ, corporis, ipsiusque ægri con- » stitutione; alii quidem convulsivis speciem hunc affectum esse volunt; » sed reverà hîc nulla adest convulsio, verùm ratiocinatione ac imagi- » natione depravatâ in hunc insanum & perversum saltandi affectum se- » runtur, quo forsan aliquid etiam facit, humoris fervor corpus sti- » mulans & quasi titillans. « In eandem ferè sententiam descendit *Sennertus* (f); ex ipso enim » ortum habet, procul dubio hoc malum, ab hu- » more maligno, tarentulæ veneno simili; interdum tamen etiâ in ipso » corpore, tale venenum, tarentulæ veneno, cognatum, generari non est » impossibile « Hunc quoquè affectum, cum *Tarentismo* confundit *Wedelius* (g). Hujusce membrorum inquietudinis, & cæstri cuiusdam ratio, videretur esse *Willisio* (h), quòd spiritus animales, quatenus in toto nervoso genere, à copulâ heterogeneâ incitati, efferi prorsus, ac effrænes evadunt. Nonnulla quoquè de eodem affectu delibavit *Cheyne*, (i) qui morbum hunc, singularem esse fateri coactus, de causis, nec apertiùs, nec solidiùs, quàm memorati superiùs auctores ratiocinatur. Hunc ex paralyfi, & convulsione conflatum affirmat, sæpèque procedentem ab epilepsiâ, præsertim in juvenibus; terribilis alicujus aliquandò morbi prodromum esse contendit. Nec majorem affert lucem *Dumoulin* (k): *Sydenhami* plagiarium, qui de *Tarentulorum* convulsionibus & per saltationem curatione disserens, nonnulla de *Choræa* confabulatur. Hanc à tarentulæ morbo oriri asserit, *Choræa* que nomen, per analogiam ducit, à quibusdam veris aut fictis mulierum convulsionibus. At ad singularem hanc convulsivis speciem seriò attendas; caveque ne confundas cum *Tarentismo*, à quo toto cælo distat, tum ratione symptomatum, tum ratione causæ: nullâ enim prægressâ sensibili læsione, vel venenosâ puncturâ, sensim sine sensu sese prodit, in regionibus, ubi talis non insidiatur aranea. Nec minùs dispar, ab hysterice mulierum spasms, motibus inordinatis seu ataxiis. Affectus isti, sive veri

(a) Loco citato.

(b) Lib. 2. part. 1. sect. 11. cap. 32. de c. u. sympt. sensu. intern.

(c) Lib. 1. part. 1. cap. 17. de com. Vigil. & sopor. gravi.

(d) Lib. 1. ob. servat.

(e) Lib. 2. comment. in Dioscor. cap. 57.

(f) Loco citato.

(g) Georg. Volte. Wedelius Exercit. Semiotico - Patolog. cap. 9. de Chor. S. Viti & Tarentismo.

(h) Thomas Willis de mor. convul. cap. 7.

(i) Traité de la maladie Anglaise.

(k) Traité des Rhencausmes & Vagants.

5

sint; siue fictitii, solis familiares sunt mulieribus & quidem adultis, quas omni tempore invadunt; præcipuè verò silentibus aut malè fluentibus menstruis. *Chorea* autem, pueros aliquandò, puellas sæpiùs, infra pubertatem adoritur tantùm: neutiquàm in posterùm. Nihil molesti præter tripudiationem & membrorum instabilitatem experiuntur, hoc morbo laborantes. Non dolet caput, non ventriculus. Rectè functiones edunt, tùm vitales, tùm naturales. Ad mortem non terminatur *Chorea*, verùm nisi antè pubertatem natus, haud ampliùs, aut difficillimè tantùm deletur. Ad vitam perdurat, ægotantesque ad mortem usquè comitatur impotentia seu membrorum instabilitas, sicuti jam in uno aut altero ægotante observavimus. Huic veritati robur addit *Hippocratis* (1) testimonium. „Pueris, inquit, plurimi morbi judicantur, ipsis ad pubertatem accedentibus: „qui verò pueris permanserint, neque circà pubertatem soluti fuerint, „aut scæminis cùm menstrua erumpunt, inveterascere consueverunt.“ Hujus affectûs causam & ortum, sicut & plurimum aliarum affectionum, apprimè cognoscere, quamvis sit difficilè; suspicamur, in primis viis ventriculo nempè & duodeno, eruditibus, impuris, indigestisque succis scætentibus nidulari: quorum transmissione & appulsu in nervos, sensus ac motûs pervertitur æqualitas, undè inordinato impulsu, læsæque, motûs & resistentiæ proportionem debitâ, spasmodicum hunc oriri affectum asserere non dubitamus. Eo ducti quoddam pueri, ut debilioris texturæ, ob dentitionem, lumbricos, aliaque id genus, convulsionibus facillimè corripiantur: gulæ insuper naturâ dediti, absque normâ & defectu comedunt. Puellæ, aliundè, quas sæpiùs invadit *Chorea*, humidioris sunt constitutionis, domi magis addictæ, vitam agunt ut plurimùm, otiosam, majorem propterea humorum copiam generant, undè innumeri oriuntur, quibus, antè catameniorum eruptionem, corripuntur affectûs, qui fluentibus quandoquè menstruis fugiunt, silentibus verò recrudescunt. Talis est *Chorea*, quæ nullas post mensium eruptionem corripit.

(1) Aph. 18.
sect. 3.

I V.

ÆQUE impossibile est, *Choream* non agnoscere, atque in ejus curâ hallucinari. Non minùs evidens & certa prognosis. Rarus hic morbus, non multos observavit *Sydenham* (a). „Hoc morbo, inquit, haud „pauciores quinque laborantes, vidi & sanavi ipsemet, & venæsectionibus, „& purgationibus per intervalla celebratis.“ Curandi methodus ab eo proposita, indicationes curativas adèd accuratè adimplet, ut, modò ritè & prudenter adhibeatur, inter phænomena reponendum sit quemquam ab hoc morbo, non convaluisse. Indicationes curativas, ut cum eo loquamur, eo dirigit, ut 1.º humores in nervos irruentes, tùm venæsectione, tùm purgatione minuantur; dein genus nervosum corroboretur; quod mirè præstat proposita methodus. Primò enim venæsectionibus, ter quaterve parçâ manu repetitis, sanguinis minuitur fervidior motus, laxiores mollioresque evadunt fibræ, purgationibus deindè lenissimis, alternis diebus, ad tres vices, post singulas venæsectiones, propinatis, ventriculi arcetur colluvies; quæ in nervos irruens suprâ memorata suscitabat symptomata. Quamvis enim, genuinam hujus morbi causam agnoscat tantùm, humores in nervosum genus irruentes, suspicari tamen videtur, humores istos sedem

(a) Loco cit.
tato.

in ventriculo obtinere. Hujus assertionis veritatem abundè probant, multoties, ab expertissimo eodem viro, repetitæ purgationes. Ex ipsius insuper verbis : (b) Haud deterrendus est Medicus à faciendis evacuationibus, si fortè membrorum subsultum, vel motum convulsivum in ægri corpore persentiscat. Quandòquidem in quibusdam generis nervosi affectibus, tam venæsectio, quàm purgatio, etiam sæpius repetitæ, non tantum non nocent, sed & necessariò sunt adhibendæ. Secundò, narcoticis, concitata à purgantibus, sanguinis compescitur effervescentia. Cardiacis deniquè firmatur ventriculus, & per consensum, nervi octavi paris, qui cum intercostalibus concurrentes spasmodicum hunc procreant affectum. In eo intercostalibus concurrentes spasmodicum hunc procreant affectum. In eo ceteris antecellit *Sydenhami* methodus, quòd celeberrimorum in praxi Medicorum autoritate fulciatur. *Hippocrates* (c) Medicorum princeps, Doctissimusque Hippocratis commentator *Galenus* (d), duplicem agnoscunt tantum convulsionum causam. Inter axiomata reponit *Hippocrates* (e) omnes quoscumque morbos ex repletione, vacuatione curari. Convulsiones præsertim puerorum, ex repletione accidere, triplici rationum momento, demonstrat *Horslius*. (f) Evacuaciones quoque, imprimis menstruales, morborum convulsivorum medicatrices esse, docuit hujus scholæ splendor *Durerus* (g); « menstruorum proprium est, inquit, sanare convulsionem : puerilis enim epilepsiæ finem adfert menstruorum purgatio. Puerilis epilepsiæ sanatio est in pubertate, cum primum virgo menstrualis est, ac menstrua illi benè respondent. Ratio autem sanandi convulsionem, menstruorum, in vacuatione consistit humoris convulsivi, quo expediti nervi, non ampliùs contrahuntur nobis invitis, nec cerebrum etiam, quod olim ciebat epilepticam convulsionem, dum ejus contractio, seipsum versus, arripiebat suas spinalis medullæ, & inde nervorum propagines : sed ea contractio cerebri epileptica, quæ cadit in pueros, non est vaporis tetri, aut qualitatibus malignæ, sicut in grandioribus esse solet : verum humoris crassi & frigidi, proptereaque, hujus præsidia sunt in vacuatione propriâ humoris morbitici. » Post amplissimam *Chorea* descriptionem : stupendi hujus affectus causam & ortum pendere asserit *Horslius* (h) ab aliquâ evacuatione suppressâ, cujus occasione, vapores flatuosi, in fibras musculorum penetrantes, convulsionem excitant : primarias autem horum vaporum sedes, ventriculum assignat & uterum. Ex *Baglivio* (i) omnes serè infantiùm convulsionem, à stomacho fiunt, undè iis statim morbum solvunt lenia purgantia, præsertim insusum rhabbarbari. *Hippocratis* (k) testimonio, convulsionem, muliebria, si circa initia appareant, neque febris accesserit, solvunt. « *Hoffmannus* (l) ventriculum, intestinorumque canalem, ad excitandas convulsionem, primas sibi vindicare deducit ex ipsius ventriculi & intestinorum stucturâ, ob præsentiam cruditarum, acidarum & viscidarum, in duodeno potissimum stabulantium, quæ concursu, bilioli & pancreatici succi, promptissimè acrem ac causticam serè indolem acquirunt. His debellandis convulsionibus, easdem ac *Sydenham* sibi proponit indicationes. Tanta aliundè fides erat *Sydenhamo* (m) convulsionem puerorum, solis evacuantibus curari posse, ut inter problemata annumeret : an puerorum dentitionum convulsionibus medela afferri possit, absque venæsectione ; quam specificis quibuscumque vel decantatissimis, quæ hæcenus innotuere, longè antefereendam esse contendit. Adeò certa insuper ac efficax est *Sydenhami* methodus, ut, teste experientiâ, modò à prudenti Medico habi-

(b) Loco citato.

(c) Aph. 39. sect. 6.

(d) Lib. 2. de cons. symp. & lib. de tremo. cap. 4. & 1.

(e) Aph. 22. sect. 2.

(f) Gregorius Horstius libr. 6. de morb. puer. quest. 4.

(g) Lud. Durer. in conc. Hipp. tract. 3. de morb. mulie. n.º 23.

(h) Lib. 2. de morb. capit. 1. observ. 45. in epist. Jacob Eckholdt; ad Gregor. Horst. de acri. convul. & motib.

(i) Lib. 1. prax. Med. de dolor. in gener. convul. & motib. convul. (k) Coac. prænot. sect. 2.

(l) Frid Hoffmannus. sect. 2. cap. 21. tom. 3. de motib. convul.

(m) Cap. 5. de morbil. anni 1670.

7
tâ ratione ætatis & virium ritè adhibeatur, absque recidivæ metu eradice-
tur morbus, eâ tamen cautione, » ut pertundatur ægro vena, & ad dies
» aliquot purgetur, eâ anni tempestate, vel paulò antè, quâ morbus inva-
» sit «. Adeò brevis deniquè, ut si nullus admittatur error intrâ mensis unius
cancellis, pristinæ sanitati restituatur æger. Suprà memoratam methodum,
ad convulsiones puerorum sanandas, efficacissimam esse, adeò sibi conficius
erat *Sydenham*, ut verisimile illi videatur, hanc, quamvis non sit expertus,
epilepsia adutorum curationi, convenire posse: modò remedia, eorum
ætati ritè adæquentur: sanguinis, nempe, detrahendi quantitas, catharti-
corumque dosis adaugeantur.

V.

QUAMVIS ex suprà dictis constet, *Sydenhami* methodum, pruden-
ter administratam, ad *Chorem* tutò & citò sanandam, cæteris palmam
præripere: ut clariùs elucescat assertiois nostræ veritas, sufficit ut hujus me-
thodi, ineatur comparatio, cum aliis quæ à diversis authoribus, qui huic morbo
medelam asserre conati sunt, fuerunt usurpatæ: quas inter, methodum à
D. Cheyne (a) delineatam seligimus. Huic sanando morbo tria sibi propo-
nit. 1°. Evacuationem, 2°. attenuationem, 3°. tandem fibrarum astrictio-
nem, quibus ut faciat satis, vomitoria, aliaque drastica remedia per lon-
gum tempus sæpè iteranda præscribit, ut ipsius verba declarant. » Primæ
» indicationi satisfactorius, inquit, vomitorium miscebam, sive ex vino eme-
» tico cum infusione radices ipecacuanhæ, sive ex tartaro stibiato, cum
» ejusdem radices pulvere, quæ per longum tempus, eâdem ipsâ hebdoma-
» dis die iterabam, usquè ad remissionem, quo tempore horum usum mi-
» nuebam. Secundæ, per mensis vel sex hebdomadarum spatium, singulis die-
» bus intermediis, æthiopis mineralis peramplam dosim porrigebam, quod
» aquarum *Bath* ope præcipitabam. Tertiæ tandem, electuarium, ex cortice
» aurantiorum, pulvere glandium & croco martis astringente confectum
» præscribebam, quo nervos intùs adstringebam, ut autem idem extùs fie-
» ret, aliis diebus balnea frigida imperabam. « Hæc quidem methodus nul-
latenus nobis admittenda videtur: vulgari enim axiomati Medico repugnat,
tutò citò & jucundè instituendam esse curationem. Primò, non tutâ est: hujus
enim cardo vertitur in remediis drastice, quæ tenellulas puerorum fibras,
omissis præcipuè venæsectionibus, cæterisque remediis diluentibus, dila-
cerare, mortemque, morborumvè iliadem morte pejorem accersere valent.
À talibus præterea semper abstinerunt, omni ævo, melioris notæ Medici.
» Si ætatis tenerimæ, virium summæ imbecillitatis, habeatur ratio, inquit
» *Harris*, (b) prudentis sanè Medici erit, ab omnibus emeticis abstinere, aut
» etiam in totum abhorre. Sanguinis verò modica detractio per venæ-
» sectionem vel hirudines, sæpissimè ex usu est, & maximè conducit; Me-
» dicina deinde leniter cathartica, tum ventriculum tum intestina, pra-
» vis humoribus repletâ, liberat & exonerat. « *D. Wanswiten* (c) ad sanan-
das convulsiones, omnia laxantia & emollientia dicta proponit, asserit-
que antiquiores doctioresque in praxi Medicos, *Hippocratem*, *Celsum*,
Galenum, *Aræteum*, &c. unanimi consensu mollissima remedia, ad convulsio-
nes curandas commendavisse. *Hoffmanni* (d) testimonio, convulsionum cu-
rationem, non multis ac drasticis remediis perficere, sed magis blandis ac
naturæ congruis instituere convenit præsidii quæ patientiâ, ac temporis

(a) Eoco citato.

(b) De morb. acut. infans.

(c) In Boerh. Aph. de convul. n.º. 234.

(d) Eoco citato.

(e) Sect. 1.
cap. 1. de con-
sensu part. ner-
vosi gener.

(f) Loco ci-
tato.

diuturnitate adjuta, omne curationis momentum absolvere possunt. Et aliàs
(e) imprudentiæ & temeritatis accusat eos, qui in dentitionis difficultate, ubi
spasmi genus nervosum vehementer torquent, purgantia acria, iterum atque
iterum propinant, tristi eventu præposterum ejusmodi consilium satis confir-
mante. Secundò, non jucunda: prolixior enim est; puerisque, idcirco, sem-
per morosis, & à quibuscumque remediis naturâ abhorrentibus, minimè accom-
modata. Tertiò tandem, non citâ; ipsius authoris testimonio; magnâ enim cum
fiduciâ, valdè sibi congratulatur, quòd, post tres, ad minùs menses, in tot
laboribus exhaustis, tantâque, remediorum drasticorum, & nauseabun-
dorum farragine devorandâ impensos, huncce morbum feliciter debella-
verit. » Quoties, (f) inquit, *Chorem* hac methodo curavi, mihi semper ex
» animo successit, ut possunt testari nonnulli adhuc viventes quos sanavi,
» (per paucos autem sanavit). Hic curæ, rarò ultra tres menses insudavi. «
Alii omnes, qui de hoc morbo mentionem fecerunt, à recto tramite devia-
verunt. Qui morbum hunc *Tarentismo* analogum censent, à saltationibus
sperandam esse medelam autumant. Qui epilepticum quid inesse suspicantur,
ad antispasmodica & antiepileptica tantùm, tanquàm ad sacram anchoram,
confugiunt. Verùm præter *Sydenham* nullus genuinam morbi historiam,
nullus curandi methodum, ejusce affectus causæ & symptomatibus eradi-
candis accommodatam tradidit. Teste insuper experientiâ; ex quindecim
& amplius ægris hac methodo curatis, venæsectionibus, scilicet parçâ ma-
nu repetitis, catharticis, narcoticis & cardiacis ad *Sydenhami* mentem pro-
pinatis, omnes absque recidivâ convaluere: undè concludere licet.

Ergò *Chorea S. Viti Evacuantia, Narcoticis & Cardiacis interpolata.*

DOMINI DOCTORES DISPUTATURI.

- | | | |
|---|---|--|
| <i>M. Ambrosius Hosty, Lega-
tionis Anglica Medicus
ordinarius.</i> | <i>M. Anna - Claudius Dorigny,
Rei Herbaria Professor de-
signatus.</i> | <i>M. Joannes-Damianus Cheva-
lier, Regis Consiliarius Me-
dicus in Insulâ Sancti Do-
mini.</i> |
| <i>M. Joannes Mac - Mahon,
Nosocomii Regii Colma-
riensis Medicus ordinarius.</i> | <i>M. Carolus-Augustinus Van-
dermonde.</i> | <i>M. Emanuel - Mauritius Du-
verney, Olim Anatomæ &
Chirurgiæ Professor in Hor-
to Regio Parisiensis.</i> |
| <i>M. Franciscus Thierry.</i> | <i>M. Ludovicus-Joannes-Bap-
tista Cosnier.</i> | <i>M. Ludovicus-Claudius Bour-
delin, Antiquus Facultatis
Decanus, Regiæ Scientiarum
Academiæ, Regiæque Socie-
tatis Berolinensis Socius, &
in Horto Regio Chymia Pre-
fessor.</i> |

Proponebat Parisiis HENRICUS - JACOBUS MACQUART,
- Remus, Doctor Medicus Remensis, necnon Saluberrimæ Facultatis
Medicinæ Parisiensis Baccalaureus, A. R. S. H. 1753,
A SEXTA AD MERIDIEM.

Typis Viduæ QUILLAU, Universitatis & Facult. Medicinæ Typographi; 1753.